

NAQQIUT

Akissuteqaat 15. november 2024-imeersoq taarserpaa
(Immikkoortup kalaallisut qulequtaa allanngortinneqarpoq).

Uunga

allannguutissatut siunnersuut

**Uunga siunnersuut: Takornariartitsinermit, sumiiffinni nunami aalajangersimasuni zone-nut
agguaasarneq il.il. inuussutissarsiutigalugu ingerlatsinermi aammalu killeqartumik sumiiffiit
ilaanni angalaarsinnaaneq pillugit Inatsisartut inatsisaat**

Pingajussaarinninnermi Naalakkersuisunit saqqummiunneqartoq.

Siunnersuutip qulequtaanut

1. Siunnersuutip qulequtaa ima oqaasertaliorneqassaaq:

”Uunga siunnersuut:

**Takornariartitsinermik suliaqarneq aamma inuussutissarsiutigalugu sulinermit zonenut
immikkoortiterineq il.il. pillugit Inatsisartut inatsisaat”**

§§ 1-imiit 18 ilanngullugu allannguutinut

2. §§ 1-imiit 18 ilanngullugu ima oqaasertaliorneqassapput:

“Kapitali 1

Atuuffia aamma isumasuu

§ 1. Takornariartitsinermik ingerlataqarnermut Inatsisartut inatsisaat atuuppoq.

Imm. 2. Inuussutissarsiutigalugu sulinermit Inatsisartut inatsisaat aammattaaq atuutissaaq.

Imm. 3. Suliniutinut sumiiffinni nunami aalajangersimasuni takornariartitsinermit
akuersissuteqartarnissaq pillugu Inatsisartut inatsisaat malillugu akuersissutini ilaatinneqartunut
Inatsisartut inatsisaat atuutinngilaq.

Imm. 4. Inunnut imaluunniit inatsisitigut pisinnaatitaasunut pisussaatitaasunullu, Kalaallit
Nunaannut imaluunniit Kalaallit Nunaannit imaluunniit Kalaallit Nunaanni inunnik angallassinermik
suliaqartunut, tassunga atatillugu takornariartitsinermik ingerlataqarneq suliarineqarani, Inatsisartut
inatsisaat atuutinngilaq, taamaattoq § 15 takuuk.

Imm. 5. Branchet, inatsisartut inatsisaannit matuminnga ilaatinneqartussaannigitsut pillugit Naalakkersuisut aalajangersakkanik erseqqinnerusunik aalajangersaasinnaapput.

§ 2. Inatsisartut inatsisaanni matumani takornariatitsinermik ingerlataqarneq ima paasineqassaaq, pingaarnertut takornarianut aningaasaqarnikkut ingerlatsinerit ingerlatsinerillu allat, Kalaallit Nunaanni misigisaqartitsinissamik iluseqartumik sullissinermik neqerooruteqarnissamik siunertaqartut, aamma ima tuniniarneqartut:

- 1) ulloq naallugu angallassinertit unnuinertaqanngitsut, aamma
- 2) angallassinertit ullunik arlalinnik sivisussuseqartut.

Imm. 2. Inatsisartut inatsisaanni matumani takornarialerisutut paasineqassaaq inuk imaluunniit inatsisitigut pisinnaatitaasoq pisussaataasorlu, § 3, imm. 1 malillugu takornarialerinerimik ingerlataqarnissamut akuersissummik atuuttumik pilik.

Imm. 3. Inatsisartut inatsisaanni matumani takornariatut paasineqassaaq inuk, inuup nalinginnaasumik najugaqarfīgisami imaluunniit najukkami avataanut sumiiffimmut angalasoq, aamma angalaneq tamarmi imaluunniit angalanerup ilaa nuannisaarnissaq, peqqissarnissaq imaluunniit sulinggiffeqarnissaq eqqarsaatigalugu pisoq, aamma tassunga atatillugu sullissinernik imm. 1-imi ilaatinneqartunik pissarsisoq.

Kapitali 2

Takornarialerinerimik suliaqarnissamut akuersissut

§ 3. Imm. 2 malillugu takornariatitsinermik suliaqarneq taamaallaat akuersissummik atuuttumik pigisalimmit suliarineqassaaq.

Imm. 2. Inunnut imaluunniit inatsisitigut pisinnaatitaasumut pisussaataasumullu, §§ 7-miit 10 ilanngullugu malillugit piunasaqaatinik naammassinnittunut, Naalakkersuisut akuersissutinik atulersitsissapput. Takornariatitsinermik suliaqarnissamut akuersissut, tamanna immikkut ittumik pissutsit pissutissaqartippassuk, piffissamut aalajangersimasumut killilerlugu atulersinneqarsinnaavoq.

Imm. 3. Akuersissutip atuuffiani tamarmi, §§ 7-imiit 10 ilanngullugu piunasaqaatit takornariatitsisup naammassissavai. Takornariatitsisup piunasaqaatit naammassinngippagit, inatsisartut inatsisaanni § 14, imm. 1 malillugu takornariatitsisoq naalakkiummik atulersitsivigineqarsinnaavoq. Isumannaallisaaneq pillugu eqqarsaatigisassat suliarineqarnissaannut aamma uumasut pinngortitamilu sumiiffiit aalajangersimasut qajassuunneqarnissaannut, takornariatitsinermik suliaqarnissamut akuerissutip piffissami atuuffiani ilutsit aalajangersimasut suliarinissaannut, malittarisassani piunasaqaatinik amerlanerusunik, takornarialerisup naammassisassaanik, Naalakkersuisut aalajangersaasinnaapput.

Imm. 4. Takornariatitsinermik suliaqarnissamut akuersissut, Naalakkersuisunit allakkatigut akuersissuteqarnikkut allanut tunniunneqarsinnaavoq.

Imm. 5. Takornariatitsinermik suliaqarnissamut akuersissutit Naalakkersuisut tamanut saqqummiussinnaavaat.

Imm. 6. Takornarialerisumi takornariartitsinermik suliaqarnermit 1-mit arlalinnilluunniit aningaasatigut kaaviiartitsineq katillugu ukiumut 50.000 kr.-it qaanginnigpagit, imm. 1 apequtaatinnagu akuersissuteqarnissamik piumasaqaat atuuppoq.

§ 4. Suliniutit inatsisartut inatsisaanni aamma takornariartitsinermik suliaqarnissamut akuersissutit kiisalu taakkuninnga nakkutilliinermut ilaatinneqartut pillugit paasissutissat, oqartussaasut suliarinninnerannut pisariaqartinneqartut tamaasa, takornariartitsinermik suliaqarnissamut akuersissummik qinnuteqartut takornarialerisullu nalunaarutigissavaat.

Imm. 2. Statistikkiliornissamut siunertat anguniarlugit, imm. 1 malillugu paasissutissat kinaassutsimik ilisarsisinnaajunnaarsillugit, pisortat oqartussaasuinut aamma ingerlatseqatigiiffiit namminersorlutik oqartussanit pigineqartunut Naalakkersuisut avitseqatigiissutigisinnaavaat.

Imm. 3. Imm. 1 malillugu akuersissutit pillugit takornariartitsinermik suliaqarnissamut aaqqissuussinerup suliassiissutigineqarnissaa siunertarlugu, pisortani oqartussaasuinut imaluunniit ingerlatseqatigiiffiit namminersorlutik oqartussanit pigineqartunut, § 6, imm. 1 malillugu Naalakkersuisut pisussaaffiik pisinnaatitaanerinnillu tiguisimasunut, paasissutissat Naalakkersuisut avitseqatigiissutigisinnaavaat.

§ 5. Kalaallit Nunaanni takornariartitsinermik suliaqarnissamut akuersissutit atulersinneqarnerannut piumasaqaatit ingerlatseriaatsillu pillugit malitarsissat erseqqinnerusut Naalakkersuisut aalajangersarsinnaavaat, matumani takornarialerisut nalunaarusiornissamik pisussaaffii aamma paasissutissat allat nalunaarutiginneqarnissaannut piumasaqaatit pillugit.

§ 6. § 3 malillugu takornariartitsinermik suliaqarnissamut, § 13 malillugu nakkutilliinissamut, § 14, imm. 1 malillugu naalakkiummik nalunaaruteqarnissamut, kiisalu § 14, imm. 2 malillugu takornariartitsinermik suliaqartumut akuersissutit utertinneqarneranut atatillugu aamma piginnaatitaanerit pillugit pisussaaffitsik, ingerlatseqatigiiffimmut namminersorlutik oqartussanit pigineqartumut imaluunniit kommunalbestyrelsimut ataatsimut Naalakkersuisut tunniussinnaavaat.

Imm. 2. Ingerlatseqatigiiffik namminersorlutik oqartussanit pigineqartoq imaluunniit kommunalbestyrelse ataaseq, imm. 1 malillugu pisussaaffinnik pisinnaatitaanernillu tunineqartoq, pisussaaffinnut pisinnaatitaanernullu taakkuninnga atasumik inatsisini ingerlatsinermut tunngasuni malitarsissannut tunngavinnullu, Kalaallit Nunaanni Namminersorlutik Oqartussat ataanni pisortat ingerlatsineranni atuuttunut ilaatinneqassapput, matumani pisortat ingerlatsineranni suliassat suliarineqartarnerat pillugu Inatsisartut inatsisaat aamma inunnik paasissutissamik suliarinnittarneq pillugu inatsit ilanngullugit.

Imm. 3. Pisuni pisussaaffiit pisinnaatitaanerillu ingerlatseqatigiiffimmut namminersorlutik oqartussanit pigineqartumut imaluunniit kommunalbestyrelsimut ataatsimut tunniunneqarneranni, nakkutilliineq pillugu kiisalu naammagittaalliorsinnaaneq pillugu Naalakkersuisut malitarsissannik erseqqinnerusunik aalajangersaasinnaapput.

Kapitali 3

Pisinnaatitaaffinnik piginnittut

§ 7. Takornariartitsinermik suliaqarnissamut akuersissut inummut taamaallaat tulliuttuni taaneqartunik naammassinnittumut nalunaarutigineqarsinnaavoq:

- 1) Kalaallit Nunaanni inunnik nalunaarsuisarfimmi adresseqartumut,
- 2) Kalaallit Nunaannut tamakkiisumik akileraartussaataasumut, aamma
- 3) nammineq pisuussutiminik tamakkiisumik atuisinnaasumut aamma akiliisinnaajunnaarneq-, akiliisinnaannginneq- imaluunniit atorunnaarsitsineq pillugit suliaqarfigineqanngitsumut.

§ 8. Inatsisitigut pisinnaatitaasumut pisussaataasumullu takornariartitsinermik suliaqarnissamut akuersissut taamaallaat nalunaarutigineqarsinnaavoq ukununga:

- 1) suliffeqarfimmut piginnittut aningaasaliissutaannaanik akiliisussatut pisussaataasumut imaluunniit ingerlatseqatigiiffimmut ingerlatseqatigiiffimmi peqataasup minnerpaamik ataatsip ingerlatseqatigiiffiup akiligasaanik akiliisussatut pisussaataasumut Kalaallit Nunaannilu angerlarsimaffeqartumut,
- 2) akiliisinnaajunnaanermik-, akiliisinnaannginnermik- imaluunniit atorunnaarsitsinissaq pillugit suliaqarfigineqanngitsumut,
- 3) tassani suliffeqarfiup piginnittut aningaasaliissutaannaanik akiliisussatut pisussaataasup aningaasaataasa affai sinnerlugit inunnit, § 7, nr. 1-miit 3 ilanngullugu piumasaqaatinik naammassinnittunit toqqaannartumik toqqaannanngitsumilluunniit pigineqarluni,
- 4) tassani suliffeqarfimmi piginnittut aningaasaliissutaannaanik akiliisussatut pisussaataasumi taasisinnaatitaanermut piginnaatitaaffiit affai sinnerlugit toqqaannartumik toqqaannanngitsumilluunniit inunnit, § 7, nr. 1-miit 3 ilanngullugu piumasaqaatinik naammassinnittunit, pigineqarlutik, aamma
- 5) tassani ingerlatseqatigiiffimmut ingerlatseqatigiiffimmi peqataasup minnerpaamik ataatsip ingerlatseqatigiiffiup akiligasaanik akiliisussatut pisussaataasumi peqataasut affai sinnerlugit § 7, nr. 1-miit 3 ilanngullugu piumasaqaatinik naammassinnillutik.

Kapitali 4

Sillimaniarnermut pilersaarutit

§ 9. Sullissinernut inatsisartut inatsisaanni matumani ilaatinneqartunut, aamma qinnuteqartup tuniniassallugit eqqarsaatigisaanut, takornariartitsinermik suliaqarnissamut akuersissummik qinnuteqartut, allakkatigut sillimaniarnermut pilersaarummik suliaqassapput.

Imm. 2. Sillimaniarnermut pilersaarut qaqugukkulluunniit kalaallisut tuluttullu takornarianit tikinneqarsinnaassaaq.

Imm. 3. Sillimaniarnermut pilersaarut ajutoorutaasinnaasunik nalilersuineramik aamma upalungaarsimanissamut pilersaarummik katitigaassaaq aamma nutarterneqarsimassaaq.

Imm. 4. Pissutsit navianarsinnaasut pingaaruteqarnerpaat, suliniummut inatsisartut inatsisaanni matumani ilaatinneqartumut atassuteqartut pillugit, ajutooratarsinnaanermik nalilersuineq

erseqqissumik annertuumillu paasissutissanik takornarianut ilisimasaqalersitsinissamut naleqquttuusaaq. Suliniutip piareersarneqarnerani ajutoorutaasinnaasunik nalilersuineq sulisut toqqarneqarneranni tunngaviussaaq, matumani angalanermi siulersuisut, angalanermi piffissaliusaaq, pissutsit avataanersut nalilersorneqarneranni, atortussat toqqarneqarneranni il.il.

Imm. 5. Upalungaarsimanissamut pilersaarut ajutoorutaasinnaasunik nalilersuinemik tunngaveqassaaq aamma tulliuttunik imaqassalluni:

- 1) annakannajaartoqartillugu imaluunniit ajunaarnermik pisoqartillugu iliuusissat aalajangerneqartussat allaaserineqarnerat,
- 2) sulisuni ingerlataqarnermi peqataasuni ilisimasassat, misilittagaqarnissaaq aamma pisinnaasaqarnerit pillugit paasissutissat, aamma
- 3) qinnuteqartup sulisuisa navianartumik pisoqartillugu qanoq qisuariaateqarnissaat pillugit, matumani attaveqaqatigiinnerup eqqarsaatigineqarnera ilanngullugu, paasissutissat.

Imm. 6. Pisuni inatsisiliornerit allat imaluunniit aalajangersimasumik sulisaatsit, suliniutip pineqartup suliarineqarneranut atasumik isumannaallisaanermut piumasaqaatinik malittarisassiuussisut, aamma qinnuteqartup eqqortissallugit pisussaaffigisai, atuutsillugit, imm. 1-miit 5 ilanngullugu aalajangersakkaniittut atuutinngillat.

Kapitali 5

Sillimmasiinermit matussusiineq aamma allatut qularnaveeqqusiineq

§ 10. Takornariartitsinermik suliaqarneq inatsisartut inatsisaanni matumani ilaatinneqartoq inuussutissarsiornermi akisussaanermut sillimmaserneqarsimassaaq imaluunniit allatut qularnaveeqquserneqarsimassaaq.

Imm. 2. Pisuni, takornarialerinemik suliaqarnerup suussusaani tassani matussusiisussamik inuussutissarsiornermi akisussaanermut sillimmasiisinnaaneq periarfissaatinnagu, aammattaaq qularnaveeqqusiinissaaq alla periarfissaatinnagu, imm. 1 atuutinngilaq.

Imm. 3. Imm. 1 malillugu sillimmasiinermit matussuserneqarnissamut aamma qularnaveeqqusiinissamut piumasaqaatit pillugit Naalakkersuisut malittarisassanik erseqqinnerusunik aalajangersaasinnaapput.

Kapitel 6

Immikkut ittumik akuersissutit

§ 11. Pisuni immikkut ittuni §§ 7-imiit 10 ilanngullugu aalajangersakkanit aamma inatsisartut inatsisaanni matumani § 3, imm. 4-p, § 5-ip, § 6, imm. 3-p, § 10, imm. 3-p aamma § 15-ip malitsigisaannik aalajangersakkanit aalajangersarneqartunit, piumasaqaatinit Naalakkersuisut immikkut ittumik akuersissuteqarsinnaapput.

Kapitali 7

Akiliutit

§ 12. § 3, imm. 2 malillugu takornarialerineramik suliaqarnissamut akuersissummik qinnuteqartunit kiisalu oqartussaasut suliarinnerannut atasumik aningaasartuutitut takornarialerisunit Naalakkersuisut akiliummik akileeqqusisinnaapput.

Imm. 2. Imm. 1 malillugu akiliutit akilerneqarnissaat pillugit malittarisassanik erseqqinnerusunik Naalakkersuisut aalajangersaasinnaapput.

Kapitali 8

Nakkutilliineq, naalakkiuteqarneq aamma takornarialerineramik suliaqarnissamut akuersissutip utertinneqarnera

§ 13. Inatsisartut inatsisaannik malittarisassanilu inatsisartut inatsisaata massuma malitsigisaannik takornarialerisut il.il. eqqortitsinerat Naalakkersuisut nakkutigissavaat.

§ 14. Inatsisartut inatsisaata aamma inatsisartut inatsisaat manna malillugu malittarisassat aalajangersarneqartut pillugit eqqortitsisoqarnissaanik naalakkiuteqarneq, Naalakkersuisut takornarialerisunut il.il. nalunaaruteqarsinnaapput.

Imm. 2. Takornarialerisoq inatsisartut inatsisaat malillugu naalakkiummik naammassinninngippat, takornarialerineramik suliaqarnissamut akuersissut inatsisartut inatsisaat manna malillugu atulersinneqartoq Naalakkersuisut utertissinnaavaat.

Kapitali 9

Inuussutissarsiutigalugu sulinermit zonenut immikkoortiterineq il.il aamma sumiiffiit ilaanni atuisinnaatanermut killiliineq

§ 15. Sumiiffiit ilaanni atuisinnaanermut killiliineq, aamma inuussutissarsiutigalugu suliaqarneq taamaallaat sumiiffinni erseqqinnerusumik aalajangerneqartuni, piffissani erseqqinnerusumik aalajangerneqartuni imaluunniit piunasaqaatit immikkut ittut eqqortinneqarnerisigut pisinnaaneri pillugit, malittarisassanik erseqqinnerusunik Naalakkersuisut aalajangersaasinnaapput.

Kapitali 10

Pineqaatissiinerit

§ 16. Inummut piaaraluni imaluunniit mianersuaalliorujussuarluni tulluuttunik iliuseqartumut Kalaallit Nunaanni Pinerluttulerinerami inatsimmi malittarisassat malillugit akiliisitsissummik akiliisitaasussanngortitsisoqarsinnaavoq:

1) § 3, imm. 1 malillugu takornariartitsineramik suliaqarnissamut akuersissummik atuuttumik peqarani takornariartitsineramik suliaqartumut,

2) Takornariartitsinermik suliaqarnissamut akuersissummut piunasaqaatit inatsisartut inatsisaat manna imaluunniit inatsisartut inatsisaat manna malillugu malittarisassat aalajangersarneqartut malillugit nalunaarutigineqartunik unioqquitsisumut.

3) § 4, imm. 1 malillugu oqartussaasut il.il. pisassaannik paasissutissanik eqqunngitsunik imaluunniit salloqittaataasunik nalunaaruteqartumut imaluunniit paasissutissanik nipangiussisumut.

4) § 14, imm. 1 malillugu naalakkiummik naammassinninngitsumut.

Imm. 2. Inatsisartut inatsisaat imaluunniit inatsisartut inatsisaat manna malillugu malitassat atulersinneqartut akiliisitsissummik aalajangiisoqarnissaa periarfissaliissutigineqartillugu, akiliisitsissut Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut pisussaataasumullu naalakkiummigiineqarsinnaavoq.

Imm. 3. § 5, § 10, imm. 3, aamma § 15 malillugit malitassani atulersinneqartuni, Kalaallit Nunaanni pinerluttulerinermi inatsimmi malittarisassat malillugit pineqaatissiinerit akiliisitsissutitut ilusillit aalajangersarneqarsinnaapput.

Imm. 4. Inatsisartut inatsisaata imaluunniit inatsit malillugu malittarisassat aalajangersarneqartut unioqquatinneqarnerani, Kalaallit Nunaanni pinerluttulerinermi inatsimmi malittarisassat malillugit arsaarinnittoqarsinnaavoq. Arsaarinninneq nunatta karsianut iluanaarutitut pissaaq.

Imm. 5. Akiliisitsissutit, inatsisartut inatsisaat manna imaluunniit inatsisartut inatsisaat manna malillugu malittarisassat aalajangersarneqartut malillugit akiliisitaasussanngortitaasut, nunatta karsiata pissavai.

Kapitali 11

Eqqartuussivilersuussisinnaaneq

§ 17. Pissutsit inatsisartut inatsisaanni ilaatinneqartut pillugit aalajangiineq, aalajangiinerup akuusumut nalunaarutigineqarnerata kingorna qaammatit 6 piffissaliunneqartut iluanni eqqartuussivinnut saqqummiunneqarsinnaavoq.

Imm. 2. Suliart inatsisartut inatsisaanni ilaatinneqartut, Nunatsinni Eqqartuussivimmuut sularinneqqaarfittut saqqummiunneqassapput.

Imm. 3. Naalackersuisut allatut aalajangiisimatinnagit, aalajangiinerup eqqartuussivinnut saqqummiunneqarnera aalajangiinerup naammassineqarnissaata kinguartinneqarnissaanik kinguneqanngilaq.

Kapitali 12

Atuutilersitsinermut- ikaarsaariartitsinermullu aalajangersakkat

§ 18. Inatsisartut inatsisaat ulloq 1. januar 2025 atuutilissaaq.

Imm. 2. Takornariartitsinermik suliaqarnernut, piffissami inatsisartut inatsisaata atuutilernissaa sioqquitsiarlugu inatsisit malillugit sularineqartunut, inatsisartut inatsisaat 1. januar 2027 ilanngullugu atuutinngilaq.”

Siunnersuummut oqaaseqaatit

Oqaaseqaatit nalinginnaasut

Inatsisartut inatsisaata kalaallisoortaata qallunaatoortaatalu akornanni oqaatsitigut naapertuuttoqarnissaata qulakkeerneqarnissaa allannguutissatut siunnersuutip qulakkiissallugu siunertaraa.

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-imut

Allannguutissatut siunnersuummi oqaaseqaatit nalinginnaasut innersuussutigineqarput.

Nr. 2-imut

Allannguutissatut siunnersuummi oqaaseqaatit nalinginnaasut innersuussutigineqarput.